



CAsparus ille in Misnia honestis parentibus oriundus, à teneris annis literarum studijs operam dedit, atq; in uirum doctissimum euasit. Erat præterea singulari prudentia & facundia præditus. Itaq; ob plurimas uirtutes à Sigismundo Cæsare in aulam ascitus, eiusq; Secretarius electus fuit. Vnde Imperij negotia magna cum diligentia peregit, atque plurimas controuersias composuit. Aderat is quoq; in Concilio Constantiensi adhuc iuuenis. Is cum uideret Ioannis Husi doctrinam & pietatem ex cõsilio procerum de eo iudicantium surgens & abiens, Cæsaris nomine protestatus est, sese in eius uiri mortem nequaquam consensisse. Postea uerò

in Austriæ ducum amicitiam sese insinuans, apud Sigismundum Cæsarem effecit ut Albertum suum generum eligeret, atq; ei cū Elisabetha amplissimam dotem offerret. Inde Alberti Cæsaris, postea Ladislai regis, & tandem Cæsaris Friderici cancellarius factus, res maximas peregit, atq; omnibus Germaniæ principibus ob uitæ integritatem gratissimus extitit. Erat etiam Aeneæ Syluio, qui postea pontifex factus est familiarissimus, id quod ex eorum literis patet.